

06 JUN 2001

Ali-Bandaraya

MELAKA MOHON STATUS DEWAN BANDARAYA UNTUK MPMBB

MELAKA, 6 Jun (Bernama) -- Kerajaan negeri Melaka sedang menyediakan kertas kerja memohon Kerajaan Persekutuan menaikkan status Majlis Perbandaran Melaka Bandaraya Bersejarah (MPMBB) kepada dewan bandaraya.

Ketua Menteri Datuk Wira Mohd Ali Rustam berkata kertas kerja itu, yang dijangka siap dalam tempoh tiga bulan lagi, disediakan oleh Setiausaha Kerajaan Negeri Datuk Abd Aziz Mohd Yusof dengan kerjasama Unit Perancang Ekonomi Negeri (UPEN) dan MPMBB.

"Kita rasa permohonan itu bersesuaian dengan syarat minimum untuk mendapatkan status berkenaan iaitu pendapatan MPMBB mesti melebihi RM80 juta setahun dan mempunyai penduduk lebih 300,000 orang," katanya kepada pemberita selepas mempengerusikan mesyuarat mingguan Exco di Seri Negeri, Air Keroh, di sini, hari ini.

Beliau berkata dengan status dewan bandaraya, MPMBB boleh memperolehi peruntukan lebih besar daripada Kementerian Perumahan dan Kerajaan Tempatan selain menyediakan lebih banyak kemudahan asas kepada penduduk sekitarnya.

"Perkara ini telah dimaklumkan kepada Perdana Menteri Datuk Seri Dr Mahathir Mohamad," katanya.

Ketua Menteri berkata selain itu, kerajaan negeri turut memohon untuk menaikkan taraf Majlis Daerah Alor Gajah (MDAG) sebagai majlis perbandaran kerana kriteria menjadi Majlis Perbandaran iaitu memperolehi pendapatan RM10 juta setahun dan penduduk 100,000 orang sudah dicapai.

"Dengan ini, ia dapat memajukan lagi kawasan sekitar daerah berkenaan dan kerajaan negeri sedang berusaha untuk memajukan daerah Jasin bagi membolehkannya memohon taraf majlis perbandaran pada masa hadapan," katanya.

Mohd Ali berkata kerajaan negeri meletakkan sasaran tahun hadapan untuk memperolehi status bagi kedua-dua majlis berkenaan.

Mengenai pertemuannya dengan beberapa pelabur Singapura di pejabatnya semalam, beliau berkata mereka menyatakan hasrat melabur di negeri ini dalam pelbagai sektor terutamanya Industri Kecil dan Sederhana (IKS) khusus untuk teknologi tinggi.

"Kita akan menandatangani beberapa perjanjian persefahaman semasa lawatan kerajaan negeri ke Singapura bulan depan sempena Festival Pelancongan Melaka dan promosi pusat perindustrian di sini," katanya.

Menurutnya kerajaan negeri memberi jaminan kepada mereka bahawa setiap permohonan kawasan industri akan diluluskan dalam tempoh dua minggu bagi merencanakan lagi pembangunan di Melaka.

Mohd Ali berkata pelaburan Singapura itu terutamanya dalam IKS dijangka bernilai RM30 juta dan mewujudkan banyak peluang pekerjaan kepada penduduk di sini.

"Keadaan negeri ini yang stabil memberi keyakinan kepada pelabur untuk terus melabur di sini," katanya.

Ditanya mengenai pengumuman Perdana Menteri bahawa beliau akan memangku tugas Menteri Kewangan dan Menteri Tugas-Tugas Khas berikutan peletakan jawatan Tun Daim Zainuddin, Mohd Ali berkata Perdana Menteri pernah melakukan tugas itu sebelum ini.

"Ia adalah untuk memudahkan tugas dan memastikan kelicinan dalam urusan yang dilakukan dalam proses peralihan ini sebelum beliau (Dr Mahathir) menemui calon (untuk jawatan Menteri Kewangan)," katanya.

Menurutnya peletakan jawatan Daim itu adalah satu kehilangan kepada negara kerana beliau (Daim) dan Perdana Menteri berusaha menangani masalah

ekonomi negara.

"Bagaimanapun, beliau (Daim) boleh terus menyumbangkan ideanya walaupun tidak berada dalam kabinet atau kerajaan serta parti seperti yang pernah dilakukannya sebelum menyertai kerajaan dahulu," katanya.

-- BERNAMA

SBS NAK